

Veskilkäigu asemel kõrtsi

- 8595 Oo õks jal Kaadsit kavalat,
tuud veljä vigurist -
elle õks jal päävä, kasve kats,
ütel´ õks jal umalõ esele,
maamalõ manitsõlli:
8600 ”Ese-õks-jal-kene, imekene,
kats latsõ kasvatajat!
Mis ti õks küll kullõt Taadsi sõnna,
nopõ noorigõ jutto?
Taadsi om õks küll pehme petmähe,
8605 võlss´uist valõtamma!
Õga saa-i õks teil ujast umma tütärd,
kaivoviist imekanna,
õga õks tad viist verd saa-i,
ujaviist uglakõist -
8610 uma om õks teil poig umatsõp,
uma veri veerüsäp!”
Kaadsi õks jal lausi meelestäni,
meelest, meelega poolõstani:
”Vaja om õks meil kivile keertä^q,
8615 vaja veertä^q veskelle -
Taadsikõnõ õks vaest taht saia süvvä^q,
mi kotoh kulatsket!
Täämbä lää õks ma püüdlit püüdmähe,
saiajauhõ jauhmahe.”
8620 Ese õks ütél´: “Ma eis´ lää!”,
tätä kadsat´ ”Ma kallu.
Poig, müüde õks jal iist hiiru ruuna,
jauhukuurma kogonest!”
Kaadsi õks jal lausi meelestäni,
8625 meelest, meelega poolõstani:
”Ma juu-i õks imp viina pissuge,
tõmba-i suitso sukuge!
Ese, jovva-i õks sa kotte koll´o nõsta^q,
jauhõmatte mahutõlla -
8630 ese, olõt õks sa vana ne väsinõ,
elähünü inemine.
Vana, marsi^q õks sa umma majja piti,
kopsi^q suurt koto piti!”
Esekene õks küll kullõl´ puja jutto,
8635 võtt´ uma oppusõ.
Oo õks tuud Kaadsit kavalat,
tugõvat Toomõ poiga -
kuurma virot´ õks tä pääle viis süld,
viläkoti^q kuus süld.
8640 Ette pand´ õks tä vidjä verevä,
pand´ kõrvi kõrralitse,
kua oll´ õks küll kõva vidämähe,
oll´ kimmäs kiskmahe.
Kaadsi läts õks sis rutto kallumahe,
8645 virgastõ veerümähe.
Sõit´ õks tä liina sõpro poolõ,
tougas´ ummi truukõ poolõ.
Jälke mõi õks tä päält rüäkoti,
- viläkuurma veerätelli,
8650 üte ost´ õks tä koti kulatskejauhõ,
sai hüvvi saiajauhõ.
Kaadsi vali õks sis vabrigo mano,
sai saekua poolõ.
Poiss ai õks sis kotte sae putru,
8655 linnu pand´ õks tä sisse suurt liiva,
kui olli^q õks naa^q koti^q üte rassu^q,
kalle^q üte kaalutava^q.
Kaadsi veere õks ilm viinalda kodo.
Ai õks sis hobõsõ morolõ,
8660 ai aida läve mano.
Ese tull´ õks sis vasta naardõh,
muudsa mamma muhaskõh:
”Täämbä tullit õks sa kodo, hüä poig,
armas lats aida mano!
8665 Sullõ sai õks kas kõrd kõkõ inne,
jälke inne jauhmine?”
Kaadsi õks naard´, esi ütél´:
”S´oo õks mul sai sõbra peräst,
tuli-hüä truuga peräst!”
8670 Kaadsi ai õks sis aita viläkottõ,
salvõ viirde saiajauhõ.
Ese õks sis ütél´: ”Ma avida -
käänäme käe pääle!”
Oo õks tuud Kaadsit kavalat,
8675 vigurist tuud veljä -
ese pand´ õks tä hobõst pästmähe:
”Vii^q talle s´oo verrev!
Esel kuule^q õks sul käe koti mano,
vana^q luu^q loksahusõ^q -
8680 muudsa^q saava^q õks sis koti^q kõik muaga,
puhta^q koti^q kõik poriga!”
Ese õks lausi meelestäni,
meelest, meelega poolõstani:
”Sulasõ^q õks kõik omma^q suurõh tüüh -
8685 ma kutsu õks vil tarõst Taadsikõist,
appe puhast provvakõist!”
Kaadsi õks jal naard´, esi ütél´:
”Tuul omma^q õks küll provval puhta^q käe^q,
piimädse^q peopesä^q -
8690 õga tohi-i õks tä tulla^q tolmu mano,
asto^q jauhu-aida mano!”
Kooni õks tuu ese jutto ai,
kasvataja kallut´ sõnno,
seeni õks ar Kaadsi aita ai,
8695 saat´ salvõ veere mano.
Kaadsi sääd´ õks sis targastõ aita,
pääle sääd´ saiakoti.
Esi läts õks tä tarrõ ne naard´,
elitarrõ, ilotõlli:
8700 ”Kull´a panõ^q õks no maama kohetuist,
saia-leibä segämähe!
Tõisi naaku-i õks ti kottõ putmahe,

putmahe, poolõndamma -
sinnä läävä^q õks sis hiire^q heitlemmä,
8705 kassi^q sisse kaabatamma!”
Kaadsi õks sääi esele kõnõli,
maamalõ manitsõlli:
”Hopõn sööse õks kui kaaro veid’okõsõ,
tuhmitsõllõs toorbast -
8710 mullõ õks taa ütél’ tuu möldre,
kivimiis keerätelli:
”No õks taa om hüä aig,
hüä aig, apar asõ,
õga olõ-i õks no pall’o jauhjit,
8715 kulla kotte ajajit -
miiss, tulõ^q õks no mitmõ kuurmaga,
veerä^q viie vereväga,
õga siin õks sa viidä-i mitond päivä,
olõ-i mitond üükeist!”
8720 Varste tulõ õks meil rüüpõimukõnõ,
haarus haina-aokõnõ,
aigo olõ-i õks sis kivile keertä^q,
minnä^q virvel veskelle:
üteh tulõ õks kõõ olla^q sulastõga,
8725 parep mar’ol man saista^q -
tiindre^q õks sis häste tegevä^q,
pandva^q kokko palgalise^q.
Esel om õks sul vaja aiah olla^q,
vahte^q vahalinnukõise -
8730 agu saava^q õks sis sügävä^q süleme^q,
läävä^q lindo vahalinnu^q!”
Kaadsi pand’ õks sis ette kats hobõst,
pand’ vidäjä^q verevä^q,
8735 pääle pand’ õks sis korgõ^q viläkoti^q,
lugi rõuko loofkahe.
Esi õks pand’ ne naard’,
esele ilotõlli:
”Sedä saa õks meil süvvä^q aastakast,
talvõ olla^q umah tarõh,
8740 pääle võimõ õks vil anda^q vaesillõ,
kulla kotikandjillõ!”
Ese õks sis lausi meelestäni,
uma meele poolõstani:
”Agu võtat õks üteh sa sulasõ,
8745 kallut sinnä katõkeske?
Om õks sul ütsindä rassõ
kulla kottõ nõsta^q.”
Kaadsi õks sis lausi meelestäni,
meelest, meele poolõstani:
8750 “Sulanõ õks sääi tege suurõ kur’ä,
palgaline pahandusõ:
agu tege õks sääi kurja kol’o man,
naka^q varast vaht’ mahe -
sulanõ õks kõõ taht suidsurahha,
8755 tiindre vali varastamma!”
Ese õks sis ütél’: “Ma lää,
kallu üteh, kallis lats!”
Kaadsi õks sis ütél’: ”Kae^q kotoh,
piä^q kõrda kõrralist!
8760 Ma õks küll ütsindä lää,
kallis ütsindä kallu -
õga õks ma põlõ-i suurt tüüd,

ramõhtu-i rasõndusõl!”
8765 Ime õks sis lausi meelestäni,
meelest, meele poolõstani:
”Ma saada õks küll perrä saiavadsa,
vaal’atõllõ valgõ leevä!
Taadsi om õks meil virk viimähe,
noorik käpe käümähe,
8770 om õks meil veske nurmõ otsah,
virve üte versta takah.”
Läts õks sis Kaadsi minemähe,
vikur vell’o veerümähe.
Läts õks sis vell’o versta taadõ,
8775 nopõ mõtsa nulga mano,
and’ õks tä ruuska ruunalõ,
and’ vitsa vereväle -
tiiä-s õks sis tiid kivi poolõ,
veertä^q vesiveske mano,
8780 Kaadsi tiidse õks kõõ tiid kõrdsi poolõ,
veertä^q viinavaadi mano.
Tunt’ õks ka mõtsast vällä tull’,
keerät’ üles kivi alt,
Tunt’ läts õks sis tuu hobõsõ pääle,
8785 rühke rüäkoti otsa.
Oll’ õks täl peoh kipõ piitsk,
näpits n’appa vaihõl,
verevät õks kõõ virgastõ ai,
sõit’ kulla Kaadsi kundõh.
8790 Tunt’ õks sis naard’ tugõvahe,
Vanapatt parebehe:
”Siist õks ka saasõ mi vatska,
perrelle piirakot:
vili om õks s’oo tett peräh päivä,
8795 pääle pääväminengot!”
Kaadsi õks sis rutto liina sõit’,
virgastõ turgo viirdõ.
Rutto kaldõ^q õks sis mano kaubamehe^q,
joosi^q mano joodikõllõ,
8800 joodik mõöse õks et poolõ hinna iist,
üte puuda poolõ iist.
Kaadsil sai õks sis pall’o papõrrahha,
tugõvit tuhanit.
Kõik lauli^q õks sis Kaadsit kõrdsilavva^q,
8805 viinapingi^q pille puhe^q.
Kaadsi läts õks jal kõrtse kõrraliste,
viinapuute veerüsähe,
koh istõ^q õks kõik julgõ^q joodigõ^q,
perüs muidõ petjäni.
8810 Kaadsilõ õks nää^q inne viina anni^q,
umma ollut oiutõlli^q -
tiidse^q õks nää^q Kaadsi meelekeist,
pääsõ ulle pääkeist.
8815 Kaadsi jei õks jo topsi, jei tõõsõ,
kolmandat kummutõlli,
Kaadsil lätsi^q õks jo moka^q magusast,
keele- nakas’ õks jo -perä kit’mähe:
Kaadsi õks jo liit’ leti mano,
kõndõ kõrdsimehe poolõ,
8820 leti ost’ õks jo takast lilli viina,
kai kõkõ kalleppa.
Perüs- istõ õks jo -herr pingi pääle,

laadna miiss lavva taadõ,
sis nakas´ õks jo Kaadsi juumahe,
8825 sääd´ lauda lainõtamma.
Kõik tulli^q õks jo mano teretämmä,
käve^q kätt andmahe:
”Suur olõt õks jo sõbõr suurõh liinah,
kõrk poiss suurõh kõrdsih.
8830 No naka õks mi üteh juumahe,
juumahe, süümähe.”
Kaadsiil läts õks jo veri segämätsest,
läts ugla ullibast.
8835 Sisse tull´ õks jo pargõ parusnikke,
tull´ murd mustlaisi,
teretivä^q õks jo Kaadsi terävähe,
tuli-hõste Toomõ poiga:
”Tere õks, sa suvõl suur herr,
kinä säks keväjäne!”
8840 Oo õks tuud makõt mustlaist,
parebat parusnikke -
tuud nakas´ õks jo jutto ajamahe,
parebat pajatamma:
”Tuul om õks küll ilmah hüä elo,
8845 hüä marsse^q maa pääl,
hüvvä õks kui süvvä^q, hüvvä juvva^q,
liitä^q suurt liina piti!
Pikält õks meil om ilma ello,
marsse s´oo maa pääl?
8850 Kui jovva õks mi kõigilõ anda^q,
viina veerele visada,
nuu^q kitvä^q õks sis meid kimmähe,
andva^q avvo armahe.”
Üts ütäl´ õks sis miiss üte sisest,
8855 kavval katõ vaihõlt:
”Kaadsi joomõ õks mi hobõsõ liiga^q,
joomõ verevä viina!”
Sis lätsi^q õks nää^q jalgo kaemahe,
huulitsat piti hul´otamma.
8860 Hopõn oll´ õks küll virk juuskmahe,
meelitark minemähe:
kivi- lei õks kõik -huulits kibõnit,
leivä^q tulda tulbavaehtõ^q,
kui õks naa^q joodigõ^q sõidi^q,
8865 lavva^q lakja laskuva^q.
Sõit sai õks sis meehete miilt piti,
mustlaistõ muudo piti,
Kaadsi möi õks sis iist hüä hobõsõ,
virga ruuna vehmrest.
8870 Sis pessi^q õks nää^q kassi plikst-plakst,
pessi^q kokko peopessi.
Joodik õks tahtsõ suure juuke,
kõrdsikõnnik kõvva viina -
liiko teivä^q õks sis liinalõ juvva^q,
8875 alõvollõ mano asto^q.
Ratso möi õks tä kõige ratastõga,
targa ruuna taostõga.
Ostja õks kaubõl´ kats hobõst,
murd´ käest mustlanõ.
8880 Man oll´ õks ka mito kaejat,
linnu liigategijät -
raha maste õks kõõ häste lavva pääle,

tugõvahe tooli pääle.
Mano õks sis passi^q pantiva^q,
8885 peledä^q piiritivä^q.
Sis nakas´ õks jo Kaadsi juumahe,
tuud rahha raiskamma,
toet´ õks sis vällä tuhanit,
visas pungast viisi sato.
8890 Esi õks tä jei, esi kitt´,
vali viina, vaot´ sõnno:
”Iäst saasõ õks mul juvva^q ese varra,
kaugõst vele katusit!
Ma õks no olõ Riia rikas,
8895 Riia rikas, Tarto tark:
naasel ka õks mul om korgõ kodo,
om marganõ maja,
kõik õks jo om mino uma,
mino osast oiutõt!”
8900 Sis näüdäs´ õks tä kirjõ kõigilõ,
pall´o loiva^q õks kõik aigo paprit.
Kõik timmä õks sis targast ütlivä^q,
viguritsest veerätivä^q,
tugõva õks et pett´ Tuula tütre,
8905 kavala kabokõsõ.
Sõbra^q õks sis naari^q ne nal´ade^q,
viina man veerätelli^q:
”Kui lääde õks sa kuna Tuula poolõ,
tandsit Tuula talli mano,
8910 sis viä^q õks sa vällä Tuula verrev,
kõkõ parep padi ruun!”
Mõni õks jal ütäl´ mõnõ seest,
viguritse^q veerätelli^q:
”Tuud om õks küll Tuulalõ vaja,
8915 toolõ papalõ paras!
Tuul oll´ õks kõõ kiksi kiskmahe,
ahnõ kokko ajamahe,
ilmah taha-s õks tä sandõlõ saata^q,
varra anda^q vaesillõ -
8920 ütele õks tä hoit´ tütrele,
kallellõ kanasõllõ.
Kaadsi, panõ^q õks sa pääle pahepuul,
käänä^q vara vastupääd!”
Kaadsi õks sis imme helläkeist,
8925 Kaadsi maamat, mar´akõist -
imel sai õks sis vatsk valmest,
pehme piirak peesütedüst.
”Taadsi, mine^q õks no rutto minemähe,
virgastõ veerümähe -
8930 kipõ om õks sääl tüü kivi man,
kulla rassõ kol´o man!”
Taadsi võtt´ õks sis valgõ vadsakoti,
lillelitse leeväkoti,
vadsa õks sisse vaotõlli,
8935 pand´ pehme piirago.
Esi õks tä puhas´ süäimest,
otsani õks täl tull´ ujahus.
Taadsi läts õks sis rutto minemähe,
virgastõ veerümähe.
8940 Tiid´o tull´ õks sis vasta tii pääl,
nobõ vasta noorikõllõ.
Tiid´o õks sis n´aug´ tirõhõhõ,

lask´ villu vilõhõhõ:
”Taadsi, tulõt õks et ikkõh tagasi,
8945 noorik nuutskeh nurmõ piti!”
Taadsi õks sis mõtõl´ umal meelel,
umal keelel keerätelli:
”Kas mullõ õks säääl Kaadsi häpü tege,
nakas irtmä imekanna,
8950 (kass õks joht näütä-i hüvvä käüke,
tiid´o tiid ilosat),
vai taht õks jo süvvä^q mu ülä,
Kaadsi pehmet piirakat?”
Taadsi õks sis virgastõ viirdõ,
8955 üle läts õks tä nurmõ nobõhõhõ,
üle kesä kibõhõhõ.
Virk läts õks sis naane veske mano,
korgõ provva kol´o viirde.
Säääl õks tä teret´ terävähe,
8960 and´ joudo julgõhõ.
Veskekene õks säääl virgastõ juusk´,
vällä vali õks säääl valgit vadsajauhõ.
Taadsi õks naari ne nal´adi,
illos provva ilotõlli:
8965 ”Kas õks n´oo^q omma^q mi jauhu^q,
mi valgõ^q vadsajauhu^q?
Kaadsikõnõ õks mul siia varra tull´,
astõ siiä aiksahe.”
Möldrekene õks sis naard´ suurõ naaru,
8970 selli^q naari^q sirgõhõ:
”Kaadsit olõ-i õks mi silmäga nännõ^q,
olõ-i kõrvaga kuulnu^q!
Ülä vei õks sul liina leeväterä^q,
viina pääle viläjauhu.
8975 Kuulõ^q õks sa, noorik noorõkõnõ,
torrõ Tuula tütrekene,
liinast tull´ õks küll kodo mu sulanõ,
keere kivipoisikõnõ -
Kaadsikõnõ õks sul liinah laulo kakk,
8980 viina man veerätelles!
Iist om õks tä mõõnü hiiru ruuna,
viläkuurma veerätänü.”
Taadsikõnõ õks sis heitõ hirmsahe,
kulla maalõ kumahto.
8985 Taadsi oll´ õks sis tuimah tunni aigo,
minode minehtünü.
Sis Taadsit õks viiga valõte,
vali suuhtõ suhkroliime,
kooni nakas´ õks jo arvo saamahe,
8990 halõnduist haardmahe.
Sis nakas õks jo ikma ilosahe,
nobõhõhõ nuutsk´mahe,
meelel tahtõ õks sis merde minnä^q,
süämel süvvä võrõngohe.
8995 Sis keeli^q õks tuud provvat kivimöldre^q,
naase süänd sütõelli^q:
”Umma naaku-i õks sa hinge hukamma,
kiir´ku-i kivi sulõngohe!
Sis saa-i õks sul imele nätä^q,
9000 saa-i kaija^q kandjallõ!”
Taadsi pill´ õks kõik vadsa^q varõsillõ,
möldre kanolõ kallut´.

Timmä tohi-s õks nää^q jalgse kodo laskõ^q,
provvat ütsindä minnä:
9005 Taadsi tege õks sis hädä häärmelle,
via vihalehesselle,
provva om õks küll hellik heitümmä,
piso lämmind pelgämmä.
Katõl timmä õks säääl käel tarrõ kanni^q,
9010 viiel sõrmõl tarrõ vei^q.
Sis heitõ^q õks säääl ese ne ime.
Taadsi jovva-s õks imp kõkkõ kõnõlda,
pahanduist pajatõlla -
kibõhõhõ õks sis keerät´ kivisell,
9015 ai jutto joodikõst.
Sis ikk´ õks taa ese ne ime,
vaagi^q vanõba^q mõlõba^q:
”No om õks meil imeh ilma pääl,
rahva naar maa pääl!”
9020 Esekene õks sis ikk´ ne ütël´,
kasvataja kahitsõlli:
”Mi pandas õks no Kaadsi kasetehe,
tuuhtõ kirjä Toomõ poig,
kost saasõ õks taa herrile lukõ^q,
9025 saa kuuko^q kuningillõ!”
Taadsikõnõ õks sis läts umma kodo,
kallis kodo kaibamma.
Õga timmä õks joht ese jalgse lasõ-s,
ese julga-s õks ütsindä laskõ^q,
9030 kallist katõla jalala -
sulanõ õks sis vei hobõsõga,
esekodo ikulist.
Taadsi jovva-s õks imp tarrõ minnä^q,
tarõ läve lähkohe.
9035 Suurõ timä õks säääl helüga ikk´,
provva kummaldõ kuuk´.
Taadsi kallut´ õks sis ese kaala mano,
oiut´ olgõ nõalõ:
”Kagoh võe õks mul hüä esekene,
9040 kõkõ parep papakõnõ,
olõs lännü^q õks ma ese antullõ,
vana Tuula tougatullõ!
Kui, näio, õks ma Alelõ astno^q,
valano^q vaesõllõ,
9045 n´oo^q jäänü õks sis iku^q ikmalda,
n´oo^q laina^q laskmalda -
sis jäänü õks mul ikk ilvesille,
ohk´mise^q oravillõ!”
Ese kaits´ õks ar kaala ümbrelt,
9050 oiut´ olgõ nõalt:
”Tütär, võidõ õks sa imele ikkõ^q,
kahida^q kandjallõ!”
Taadsikõnõ õks kui ütël´ tuu sõna,
kats-kolm kadsatõlli:
9055 ”Ülä möi õks jo iist kolm hobõst,
kolm viläkuurmat -
ime and´ õks no ilma-joodikõllõ,
kõrdsitii kõnnikõllõ!”
esekene õks jal ütël´: ”Ikku-i, tütär,
9060 kahiku-i, kallis lats!
Kodo võidõ õks ar tulla^q elämähe,
kasterahe kasumahe.”

Taadi lei õks sis käe kätt vasta,
tõista vasta tõrahit´:
9065 ”No kuulõ^q õks, mu kull´a esekene,
kõkõ parep papakõnõ:
kiräkese õks ma tei timä pääle,
tuvi, anni õks ar Tuula õigusõ!”
Esekene õks sis üteli: ”Oh sa ull´,
9070 meeleldä mino tütar!
Küll mööse õks sis Kaadi mu hobõsõ^q,
verevä^q veerätelles -
sis tulõ õks meil koolda^q kurva kätte,
suurõl leinäl liiva minnä^q,
9075 inne- tulõ õks meil -aigo ar koolda^q,
inne muid mulda minnä^q!”
Esekene õks sis iki, esi üteli,
kurval meelel kost´ sõnno:
”Iäl olõ-i õks ma suitso tõmmano,
9080 olõ-i piip peoh olno -
suitso teesi^q õks ma süämehaigusõl,
piip saasi^q õks vaest meele pehmütäjäst!”
Taadsikõnõ õks sis imele ikk´:
”Innep minno õks sa väikost vette veenü^q,
9085 minno oja uputanu -
sis minno õks taa egi imetänü,
ii kallõ kasvatanu!”
Ese õks sis imele üteli,
maamalõ manitsõlli:
9090 ”Ma tahtõ õks kui Alelõ anda^q,
vaotada vaesõllõ,
ime, mullõ õks kõõ tuud kõnõlit,
maama, mullõ manitsit:
”Inäp saadõ^q õks küll kidsi rikka käest
9095 kui lõha vaesõ käest!”
Kagoh kidsi õks no liinah keerätelles,
lõõhk kõrdsih leelotõllõs!”
Ime üteli-s imp mitte midäge,
kosta-s kolmõ sõnna -
9100 imekesel õks ka silmä^q tsilkuva^q,
juusk´ vett vii võrra.
Sis iki^q õks nää^q tiigi tii pääle,
jäti^q järve jäle pääle,
pääle iki^q õks nää^q uja ussõ ala,
9105 lätte tarõ läve ala.
Esekene õks jal kiild´ ikjit,
silmävi viskajit:
”Tütär, sullõ õks ma minnenä ütli,
kaldunna kadsatõlli:
9110 poissi mõtli^q õks sa ollõv munapudru,
mehe ollõv mesivadsa -
miiss sai õks no meelegaigus,
kasa süäme kalõstaja,
illos sai õks no miiss ikõtaja,
9115 Kaadi süäme kalõstaja.”
Taadi kuts´ õks sis esse kiildmähe,
Tuula tullu andmahe.
Esekene õks jal lausi meelestani,
meelest, meele poolõstani:
9120 ”Eiske om õks säääl ese oppaja,
kasvataja karistaja!
Õga olõ-i õks tä latsõsta opada,

olõ-i kanast karistõlla -
esi om õks täl pääh mehe miil,
9125 mehe miil, poisi pää,
õga jovva-i õks imp joodikõ opada,
viinavõtjat vitsutõlla!
Kui joosõ õks taa joodik kolm päivä,
viis päivä viina võtt,
9130 süä lätt õks sis paksost kui pang,
massa^q kogone kuiosõ^q,
pää- läävä^q õks sis -ajo^q armõtost,
kol´o kogone kur´ast,
sis saasõ õks jo kuri taplõmma,
9135 saasõ kikas kisklõmma.
Sääne saasõ õks vaest, tütar, su ülä,
saa tark Toomõ poig -
viinal omma^q õks kõik vihasa^q mõttõ^q,
ollõl ulli^q tsilkmõkõsõ^q.”
9140 Oo õks tuud tuvvi Toomõ sulast,
tarka Taadi tuujat -
nakas´ õks jo Taadit kutsmahe,
nakas´ häste häälitsemmä:
”Lääme õks ar kodo, mi noorik,
9145 suurdõ tarrõ, talotütär!
Agu om õks jo kotoh mi Kaadi,
pikk miiss peränulgah?
Ese läts õks küll perrä imega,
kaldo^q liina katõkeske.”
9150 Taadi taha-s õks kuigi kodo minnä^q,
ese majast mar´akõnõ.
Ese õks sis lausi meelestani,
meelest, meele poolõstani:
”No tulõ õks küll minnä^q, miä tetä^q,
9155 kalluda kahitõh -
lõigat sünnü-i õks imp kikk leevä mano,
sünnü-i lakk´a laulatõdu^q!”
Taadi õks jal ikula kõnõli,
silmäviil veerätelli:
9160 ”Suvõkõsõ õks ma söömaldä olõse^q,
talvõ kangäldä käüse^q,
läbi lääsi^q õks vil iädse järve,
läbi tulistõ turbastõ,
kui saasi^q õks vil näiost tõist kõrda,
9165 kabost kattõ kõrda,
näätä^q saasi^q õks kui ütest nädälest,
kaia^q katõst pääväkesest,
lillist saasi^q õks vil ese livva mano,
as´ast akna ette!”
9170 Taadi jätt´ õks sis kodo jumalaga,
rahva rahu-tervest.
Esi õks tä ikk´ ilma-väega,
kado-väega kahitsõlli:
”Kundsä^q näe-i õks imp neid kotusit,
9175 jalatalla tanomit.
Minnä^q tulõ õks jal peio piitsko mano,
tuvi, Toomõ nuie mano.
Tuud taha-i õks mul säksa säläkene,
taha-i provva puusakõsõ^q:
9180 no võtta^q õks mul ette kõik elo,
näätä^q näguripäävä^q.
Ime, jää^q õks no iäst terveest,

papa, aost pall'ost!
Õga inäp õks ti minno inne näe-i,
9185 taha-i kaia Taadsikõist -
mul tulõ õks ar hinnäst uputada,
silla päält sisse minnä^q!
Ilma taha õks ma ello lõpõtõlla,
kurva ello kustutõlla -
9190 ilmalõ õks ma jää immest,
kolgalõ kummõtest.”
Taadi ütël' õks vil viimädse sõna,
kolm sõnna kuulutõlli:
”Ese, tulõ^q õks vil mano tuuh ilmah,
9195 käänä^q kätt andmahe!
Hüä olõ-i õks mul miil memme pääle,
kallis süä kandja pääle.”
Ese jäi õks sis ikma imega,
katõkeske kahitsõmma.
9200 Taadsikõnõ õks vil inäbä ikk',
katõvõrra kahitsõlli:
”Kui minnä^q õks mul kurja kodo,
ikuliste elämiste?”
Sis läts õks jo tuvi Toomõ poolõ,
9205 kaldo sinnä Kaadi poolõ.
Kaadi käve õks jo kärkeh tarõh,
sõrmi murrõldõh morol.
Kaadi juusk' õks sis Taadi kaala mano,
hirmsa juusk' õks jo miiss hiussehe,
9210 sis pess' õks tä naist perre näteh,
teot' Taadit muidõ tiideh.
Taadi kakk' õks sis kulladsõ kossa,
vahaladva vandsutõlli,
sis pess' õks tä Taadit pingi ala,
9215 ai timä ahonulka,
suurõ^q olli^q õks täl koogu^q kosti iist,
kallis ruusk timä krammel.
Sis kiild' õks küll ese ne ime,
sulasõ^q sorahõlli^q.
9220 Esel oll' ka õks jo sipul silmä pääl,
kuruslakk kolmu pääl,
sipul olli õks jo lannõ sinitsest,
silmaveere^q vereväst,
miä olli õks tuul Kaadil kallutõt,
9225 kulakil koputõt.
Kaadi oll' õks sis kuri taplõmma,

oll' kipõ kisklõmma.
Kui õks nää^q pini^q purõliva^q,
kui kikka^q kiskliva^q.
9230 Esi õks tä pess' ne penät',
esi kolkõ ne kul'at':
”Sa õks küll kõike armastõllõt,
linnu-häste libestellet –
no sõidit õks mu suurõ sulasõga,
9235 terävä tiindrega!”
Taadsikõnõ õks küll ikk', eis' pallõl',
kummaldõ kumardõlli:
”Olõs saasi^q õks küll, naane, ma näüdädä,
oholine vällä otse^q,
9240 hinge sullõ õks sis vällä võtase^q,
näpo otsah näütäsi^q:
õga olõ-i õks ma sõbõr sulasillõ,
nopõ noorilõ mehile,
sõbõr olõ õks ma külä sõsarillõ,
9245 nopõ külä noorikillõ!”
Kaadi kullõ-s õks pall'o pallõmist,
hellä sõna heitmist -
kuri õks kõõ ütël': ”Kua^q naist!”,
pakan ütël': ”Otsi^q paalka!”,
9250 tunt' tekk' õks küll käe^q kergest,
Kaadi sõrmõ^q kallest.
Selle and' õks küll karri tä kalõstõ,
pess' kogone kur'astõ.
Taadi sai õks sis pakko, pardsikõnõ,
9255 lindo, suvilinnukõnõ.
Sis juusk' õks küll aia tä armulõ,
juusk' nõgõsõ nõalõ,
juusk' tulba tä toelõ.
Aid nakas' õks sis pääle astmahe,
9260 tulp pääle tulõmahe -
pall'o sai õks sis armo aiasta,
pall'o nõvvo nõgõsist.
Ese läts õks sis tarrõ kutsmahe,
ime majja manitsõmma:
9265 ”No tulõ^q õks sa tarrõ, mu tütär,
kambrõhõ, kallis lats!
Mi panni õks ar Kaadi taadõ-tarrõ,
tülumehe tüü-tarrõ.”
Minijä läts õks sis meelegaigusõl,
9270 provvakõnõ puhkoh.